

# Powšitkowne WOZJEWJENJA

njedźelu, 13. meje 2012

## **Nalětni koncert kulturneje brigady**

Chór 1. serbskeje kulturneje brigady z.t. přeprošuje wutrobnje na nalětni koncert njedźelu, 13. róžownika, w 17.00 hodź. w farskej cyrkwi w Njebjelčicach. Šulerjo zanjesu twórby z oratorijoweho cyklusa „Počasy“. Zaklinča tež duchowne a nalětnje spěwy serbskich a dalších komponistow. Wumělski nawod změje Budyski tachantski kantor Friedemann Böhme, instrumentalny přewod Gina Hentsch, a solistka budže Tanja Donatec.

## **Wustajeńca fotow Pawoła Roty**

Wotewrjenje wosebiteje wustajeńcy „Delany – Dopomnjeće we wobrazach“ z fotami Pawoła Roty z Ralbic budže njedźelu, 13. meje, w 15 hodź. w Budyskim Serbskim muzeju. Zawod do wustajeńcy poda dr. Barbara Stempel, wumělstwowa historikarka z Lipska. Hudźbnje wobrubu wotewrjenje Marhata Korjeńkowa. Wustajeńca je zajimcam hač do njedźele, 16. septembra, přistupna.

## **Zhromadny dzeń za 1. a 2. lětnik**

Na zhromadny dzeń do Don Boskowneho domu we Worklecach přeprošuje Dekanatne dušepastyrstwo šulerki a šulerjow 1. a 2. lětnika sobotu, 19. meje, wot 9 do 15 hodź. Zajimcy njech so prošu hač do wutory, 15. meje, pod telefonowym čisłom (03 57 96) 8 87 07 we Worklecach přizjewja. Za wudawki dnja zhromadzi so wot kóždeho wobdźělnika přinošk we wysokosći třoch eurow.

## **Nalětni koncert w klósterskej zahrodže**

W klósterskej zahrodže w Pančicach-Kukowje wuhotuje chór Lipa zhromadnje z Radworskim chórom Meja njedźelu, 20. meje, swój tradicionalny nalětni koncert. Započatk je w 15.30 hodź. Hižo wot 14.30 hodź poskići so kofej a samopječeny tykanc. Wšitcy hudźbnje zajimowani su wutrobnje do krasnje kćějaceje zahrody přeprošeni.

## **Putnikowanje młodžiny**

Wšitcy serbscy młodostni su přeprošeni, njedźelu Swjateje Trojicy, 3. junija, do Róžanta putnikować. Boža mša započnje so w 10.30 hodź.

## **Koparski turněr ministrantow**

Ministranća ze wšitkich serbskich wosadow su na koparski turněr sobotu, 9. junija, do Pěskec přeprošeni. Započatk je w 9 hodź. z Božej mšu we wjesnej kapałce.

## **„Hdyž Swjaty Duch ...“**

Pod hesłom „Hdyž Swjaty Duch ...“ přeprošuje Dekanatne dušepastyrstwo džěci 3. a 4. lětnika na zhromadny dzeń sobotu, 26. meje wot 9 do 15 hodź. do Don Boskowneho domu we Worklecach. Štóz chce so wobdźělić, njech so prošu hač do wutory, 22. meje, pod telefonowym čisłom (03 57 96) 8 87 07 we Worklecach přizjewi. Za wudawki dnja zběra so wot kóždeho wobdźělnika přinošk we wysokosći třoch eurow.